

神異典

神異典第二百十三卷

道教部彙考一

周

穆王十七年西王母來朝賓於昭宮 按史記周本紀不載 按竹書紀年周穆王十七年王西征
昆侖丘見西王母其年西王母來朝賓於昭宮

秦

始皇二十八年遣徐市入海求仙人 按史記秦始皇本紀二十八年始皇東行郡縣遂上太山立
石封祠祀乃臨於海齊人徐市等上書言海中有三神山名曰蓬萊方丈瀛洲仙人居之請得齋戒
與童男女求之於是遣徐市發童男女數千人入海求仙人 按封禪書始皇東遊海上行禮祠名
山大川及八神求仙人羨門之屬自齊威宣之時騶子之徒論著終始五德之運及秦帝而齊人奏
之故始皇采用之而宋毋忌正百僞充尙羨門子高最後皆燕人爲方仙道形解銷化依於鬼神之
事騶衍以陰陽主運顯於諸侯而燕齊海上之方士傳其術不能通然則怪迂阿諛苟合之徒自此

興不可勝數也自威宣燕昭使人入海求蓬萊方丈瀛洲此三神山者其傳在渤海中去人不遠患且至則船風引而去蓋嘗有至者諸仙人及不死之藥皆在焉其物禽獸盡白而黃金銀爲宮闕未至望之如雲及到三神山反居水下臨之風輒引去終莫能至云世主莫不甘心焉及至秦始皇并天下至海上則方士言之不可勝數始皇自以爲至海上而恐不及矣使人乃齋童男女入海求之船交海中皆以風爲解曰未能至望見之焉

始皇三十二年使盧生韓終侯公石生廣求仙藥 按史記秦始皇本紀三十二年始皇之碣石使燕人盧生求羨門高誓刻碣石門因使韓終侯公石生求仙人不死之藥始皇巡北邊從上郡入燕人盧生使入海還以鬼神事因奏錄圖書曰亡秦者胡也始皇乃使將軍蒙恬發兵三十萬人北擊胡略取河南地

始皇三十五年以盧生之說自稱真人 按史記秦始皇本紀三十五年盧生說始皇曰臣等求芝奇藥仙者常弗遇類物有害之者方中人主時爲微行以辟惡鬼惡鬼辟真人至人主所居而人臣知之則害於神真人者入水不濡入火不熱陵雲氣與天地久長今上治天下未能恬淡願上所居

宮母令人知然後不死之藥殆可得也於是始皇曰吾慕真人自謂真人不稱朕乃令咸陽之旁二百里內宮觀二百七十複道甬道相連帷帳鐘鼓美人充之各案署不移徙行所幸有言其處者罪死始皇帝幸梁山宮從山上見丞相車騎衆弗嘗也中人或告丞相丞相後損車騎始皇怒曰此中人泄吾語案問莫服當是時詔捕諸時在旁者皆殺之自是後莫知行之所在聽事羣臣受決事悉於咸陽宮侯生盧生相與謀曰始皇爲人天性剛戾自用起諸侯并天下意得欲從以爲自古莫及己專任獄吏獄吏得親幸博士雖七十人特備員弗用丞相諸大臣皆受成事倚辦於上上樂以刑殺爲威天下畏罪持祿莫敢盡忠上不聞過而日驕下懼伏謾欺以取容秦法不得兼方不驗輒死然候星氣者至三百人皆良士畏忌諱諛不敢端言其過天下之事無大小皆決於上上至以衡石量書日夜有呈不中呈不得休息貪於權勢至如此未可爲求仙藥於是乃亡去始皇聞亡乃大怒曰吾前收天下書不中用者盡去之悉召文學方術士其衆欲以興太平方士欲練以求奇藥今聞韓衆去不報徐市等費以巨萬計終不得藥徒姦利相告日聞盧生等吾尊賜之甚厚今乃誹謗我以重吾不德也諸生在咸陽者吾使人廉問或爲詖言以亂黔首於是使御史悉案問諸生諸生傳

相告引乃自除犯禁者四百六十餘人皆阮之咸陽使天下知之以懲後益發謫徙邊

始皇三十六年使博士爲仙真人詩令樂人歌之 按史記秦始皇本紀三十六年始皇不樂使博士爲仙真人詩及行所游天下傳令樂人歌弦之

漢

武帝元光二年初祠五時以李少君言親祠竈遣方士入海求蓬萊安期生之屬 按漢書武帝本紀元光二年冬十月行幸雍祠五時 按郊祀志上初至雍郊見五時是時李少君亦以祠竈穀道却老方見上上尊之少君者故深澤侯人主方匿其年及所生長常自謂七十能使物卻老其游以方徧諸侯無妻子人聞其能使物及不死更餽遺之常餘金錢衣食人皆以爲不治產業而饒給又不知其何所人愈信爭事之少君資好方善爲巧發奇中常從武安侯宴坐中有年九十餘老人少君乃言與其大父游射處老人爲兒從其大父識其處一坐盡驚少君見上上有故銅器問少君少君曰此器齊桓公十年陳於柏寢已而按其刻果齊桓公器一宮盡駭以爲少君神數百歲人也少君言上祠竈皆可致物致物而丹砂可化爲黃金黃金成以爲飲食器則益壽益壽而海中蓬萊仙

者乃可見之以封禪則不死黃帝是也臣嘗游海上見安期生安期生食臣棗大如瓜安期生仙者通蓬萊中合則見人不合則隱於是天子始親祠竈遣方士入海求蓬萊安期生之屬而事化丹沙諸藥齊爲黃金矣久之少君病死天子以爲化去不死也使黃鍾史寬舒受其方而海上燕齊怪迂之方士多更來言神事矣

元鼎元年起招仙閣於甘泉宮 按史記漢書武帝本紀不載 按洞冥記元鼎元年起招仙閣於甘泉宮西編翠羽麟臺爲簾青琉璃爲扇懸黎火齊爲牀其上懸浮金輕玉之磬浮金著色如金自浮於水上輕玉者其質貞明而輕有霞光繡有藻龍繡有連烟繡有走龍錦有雲鳳錦鸛鴻錦閣上燒荃靡香屑燒粟許其氣三月不絕進幄幄細棗出幄幄山山臨碧海上萬年一實如今之軟棗昨之有膏膏可燃燈西王母握以獻帝燃芳苾燈光色紫有白鳳黑龍異足來戲於閣邊有青鳥赤頭道路而下以迎神女神女留玉釵以贈帝帝以賜趙婕妤至昭帝元鳳中宮人猶見此釵黃謙欲之明日示之既發匣有白燕飛昇天後宮人學作此釵因名玉燕釵言吉祥也

元鼎四年封方士樂大爲樂通侯使入海求神仙 按史記漢武帝本紀樂成侯上書言樂大樂大

膠東宮人故嘗與文成將軍同師已而爲膠東王尙方而樂成侯姊爲康王后母子康王死他姬子立爲王而康后有淫行與王不相中得相危以法康后聞文成已死而欲自媚於上乃遣樂大因樂成侯求見言方天子旣誅文成後悔恨其早死惜其方不盡及見樂大大悅大爲人長美言多方略而敢爲大言處之不疑大言曰臣嘗往來海中見安期羨門之屬顧以爲臣賤不信臣又以爲康王諸侯爾不足予方臣數言康王康王又不用臣臣之師曰黃金可成而河決可塞不死之藥可得仙人可致也臣恐效文成則方士皆掩口惡敢言方哉上曰文成食馬肝死爾子誠能修其方我何愛乎大曰臣師非有求人人主求之陛下必欲致之則貴其使者令有親屬以客禮待之勿卑使各佩其信印乃可使通言於神人神人尙肯邪不邪致尊其使然後可致也於是上使先驢小方鬪旗旗自相觸擊是時上方憂河決而黃金不就乃拜大爲五利將軍居月餘得四金印佩天士將軍地士將軍大通將軍天道將軍印制詔御史昔禹疏九江決四瀆間者河溢臯陸隄繇不息朕臨天下二十有八年天若遺朕士而大通焉乾稱蜚龍鴻漸於般意庶幾與焉其以二千戶封地士將軍大爲樂通侯賜列侯甲第僮千人乘輿斥車馬帷帳器物以充其家又以衛長公主妻之齎金萬斤更名

其邑曰當利公主天子親如五利之第使者存問所給連屬於道自大主將相以下皆置酒其家獻遺之於是天子又刻玉印曰天道將軍使使衣羽衣夜立白茅上五利將軍亦衣羽衣立白茅上受印以示弗臣也而佩天道者且爲天子道天神也於是五利常夜祠其家欲以下神神未至而百鬼集矣然頗能使之其夜治裝行東入海求其師云大見數月佩六印貴振天下而海上燕齊之間莫不搃腕而自言有禁方能神仙矣入海求蓬萊者言蓬萊不遠而不能至者殆不見其氣上乃遣望氣佐候其氣云其秋上幸雍且郊或曰五帝泰一之佐也宜立泰一而上親郊之上疑未定齊人公孫卿曰今年得寶鼎其冬辛巳朔旦冬至與黃帝時等卿有札書曰黃帝得寶鼎宛侯問於鬼臾區區對曰黃帝得寶鼎神筴是歲己酉朔旦冬至得天之紀終而復始於是黃帝迎日推筴後率二十歲得朔旦冬至凡二十推三百八十年黃帝仙登於天卿因所忠欲奏之所忠視其書不經疑其妄書謝曰寶鼎事已決矣尙何以爲卿因嬖人奏之上大悅召問卿對曰受此書申功申功已死上曰申功何人也卿曰申功齊人也與安期生通受黃帝言無書獨有此鼎書曰漢興復當黃帝之時漢之聖者在高祖之孫且曾孫也寶鼎出而與神通封禪封禪七十二王惟黃帝得上泰山封申功曰

漢主亦當上封上封則能仙登天矣黃帝時萬諸侯而神靈之封居七千天下名山八而三在蠻夷五在中國中國華山首山太室太山東萊此五山黃帝之所常遊與神會黃帝且戰且學仙患百姓非其道乃斷斬非鬼神者百餘歲然後得與神通黃帝郊雍上帝宿三月鬼哭區號大鴻死葬雍故鴻冢是也其後黃帝接萬靈明廷明廷者甘泉也所謂寒門者谷口也黃帝采首山銅鑄鼎於荆山下鼎既成有龍垂胡頤下迎黃帝黃帝上騎羣臣後宮從上龍七千餘人龍乃上去餘小臣不得上乃悉持龍頤龍頤拔墮黃帝之弓百姓仰望黃帝既上天乃抱其弓與龍胡頤號故後世因名其處曰鼎湖其弓曰烏號於是天子曰嗟乎吾誠得如黃帝吾視去妻子如脫躡耳乃拜卿爲郎東使候神於太室其冬公孫卿候神河南見仙人跡緱氏城上有物若雉往來城上天子親幸緱氏城視跡問卿得無效文成五利乎卿曰仙者非有求人主人主求之其道非少寬假神不來言神事事如迂誕積以歲乃可致於是郡國各除道繕治宮觀名山神祠所以望幸矣 按漢書武帝本紀元鼎四年夏封方士樂大爲樂通侯位上將軍

元封元年東巡海上令齊人入海求蓬萊神人 按史記漢武帝本紀上議曰古者先振兵澤旅然

後封禪乃遂北巡朔方勒兵十餘萬還祭黃帝冢橋山澤兵須如上曰吾聞黃帝不死今有冢何也
或對曰黃帝已仙上天羣臣葬其衣冠既至甘泉爲且用事泰山先類祠太一上與公卿諸生議封
禪齊人丁公年九十餘曰封者合不死之名也秦皇帝不得上封陛下必欲上稍上卽無風雨遂上
封矣天子旣聞公孫卿及方士之言黃帝以上封禪皆致怪物與神通欲放黃帝以常接神仙人蓬
萊士高世比德於九皇遂東巡海上行禮祠八神齊人上疏言神怪奇方者以萬數然無驗者乃益
發船令言海中神山者數千人求蓬萊神人公孫卿持節常先行候名山至東萊言夜見一人長數
丈就之則不見見其跡甚大類禽獸云羣臣有言見一老父牽狗言吾欲見巨公已忽不見上旣見
大跡未信及羣臣有言老父則大以爲仙人也宿留海上與方士傳車及間使求仙人以千數四月
天子至梁父禮祠地主乙卯令侍中儒者皮弁薦紳射牛行事封泰山下東方如郊祠泰一之禮封
廣丈二尺高九尺其下則有玉牒書書祕禮畢天子獨與侍中奉車子侯上泰山亦有封其事皆禁
明日下陰道丙辰禪泰山下趾東北肅然山如祭后土禮天子皆親拜見衣上黃而盡用樂爲封禪
祠其夜若有光晝有白雲起封中天子從封禪還坐明堂羣臣更上壽天子旣已封禪泰山旣無風

雨菑而方士更言蓬萊諸神山若將可得於是上欣然庶幾遇之乃復東至海上望異遇蓬萊焉奉車子侯暴病一日死上乃遂去並海上北至碣石巡自遼西歷北邊至九原五月返至甘泉有司言寶鼎出爲元鼎以今年爲元封元年

元封二年祠泰一遂幸緱氏城觀神人遣方士求神采芝以千數又廣作臺觀以招來神仙之屬按史記漢武帝本紀天子旣封禪有司言以今年爲元封元年其來年春公孫卿言見神人東萊山若云見天子天子於是幸緱氏城拜卿爲中大夫遂至東萊宿留之數日毋所見見大人跡復遣方士求神怪采芝藥以千數公孫卿曰仙人可見而上往常遽以故不見今陛下可爲觀如緱氏城置脯聚神人宜可致且仙人好樓居於是上令長安則作蜚廉桂觀甘泉則作益延壽觀使卿持節設具而侯神人乃作通天臺置祠具其下將招來神仙之屬於是甘泉更置前殿始廣諸宮室云

太初元年東臨渤海望祠蓬萊又廣作宮殿置蓬萊方丈瀛洲壺梁以象海中神山按史記漢武帝本紀武帝東至海上考入海及方士求神者莫驗然益遣冀遇之十一月乙酉柏梁裁十二月甲午朔上親禪高里祠后土臨渤海將以望祠蓬萊之屬冀至殊庭焉上還以柏梁裁故朝受計甘泉

公孫卿曰黃帝就青靈臺十二日燒黃帝乃治明庭明庭甘泉也方士多言古帝王有都甘泉者其後天子又朝諸侯甘泉甘泉作諸侯邸勇之乃曰越俗有火裁復起屋必以大用勝服之於是作建章宮度爲千門萬戶前殿度高未央其東則鳳闕高二十餘丈其西則唐中數十里虎圈其北治大池漸臺高二十餘丈名曰泰液池中有蓬萊方丈瀛洲壺梁象海中神山龜魚之屬其南有玉堂璧門大鳥之屬乃立神明臺并幹樓度五十餘丈輦道相屬焉 按漢書武帝本紀太初元年冬十二月東臨渤海望祠蓬萊

太初三年東巡海上考神仙之屬又以方士言親禪石閭 按漢書武帝本紀太初三年春正月行東巡海上夏四月還修封泰山禪石閭 按郊祀志上東巡海上考神仙之屬未有驗者方士有言黃帝時爲五城十二樓以候神人於執期名曰迎年上許作之如方明年上親禮祠上犢黃焉公玉帶曰黃帝時雖封泰山然風后封鉅岐伯令黃帝封東泰山禪凡山合符然後不死天子既令設祠具至東泰山東泰山卑小不稱其聲乃令祠官禮之而不封焉其後令帶奉祠候神物復還泰山修五年之禮如前而加禪祠石閭石閭者在泰山下隄南方方士言仙人閭也故上親禪焉

天漢二年召方士言遠國遐方之事以東方朔所言洞冥草爲泥而塗雲明三館 按漢書武帝本紀不載 按洞冥記天漢二年帝昇蒼龍閣思仙術召諸方士言遠國遐方之事惟東方朔下席操筆跪而進帝曰大夫爲朕言乎朔曰臣遊北極至種火之山日月所不照有青龍銜燭火以照山之四極亦有園圃池苑皆植異木異草有明莖草夜如金燈折枝爲炬照見鬼物之形仙人甯封常服此草於夜暝時轉見腹光通外亦名洞冥草帝令剉此草爲泥以塗雲明之館夜坐此館不加燈燭亦名照魅草以藉足履水不沉

宣帝神爵元年修武帝故事立仙人玉女祠以張敞諫罷尙方待詔 按漢書宣帝本紀神爵元年春正月行幸甘泉郊太畤 按郊祀志上始幸甘泉郊見太畤數有美祥修武帝故事盛車服敬齋祠之禮頗作詩歌時京師近縣鄠則有勞谷五牀山日月五帝仙人玉女祠又立五龍山仙人祠及黃帝天神帝原水凡四祠於膚施或言益州有金馬碧雞之神可醮祭而致於是遣諫議大夫王褒使持節而求之大夫劉更生獻淮南枕中洪寶苑祕之方令尙方鑄作事不驗更生坐論京兆尹張敞上疏諫曰願明主時忘車馬之好斥遠方士之虛語游心帝王之術太平庶幾可興也後尙方待

詔皆罷

成帝 年谷永說帝以方士言神仙諸術皆詐僞宜距絕帝善之 按漢書成帝本紀不載 按郊祀志成帝末年頗好鬼神亦以無繼嗣故多上書言祭祀方術者皆得待詔祠祭上林苑中長安城旁費用甚多然無大貴盛者谷永說上曰臣聞明於天地之性不可惑以神怪知萬物之情不可罔以非類諸背仁義之正道不遵五經之法言而盛稱奇怪神廣崇祭祀之方求報無福之祠及言世有仙人服食不終之藥造興輕舉登遐倒景覽觀縣圃浮游蓬萊耕耘五德朝種暮獲與山石無極黃冶變化堅冰淖溺化色五倉之術者皆姦人惑衆挾左道懷詐僞以欺罔世主聽其言洋洋滿耳若將可遇求之盪盪如繫風捕景終不可得時以明王距而不聽聖人絕而不語昔周史萇弘欲以鬼神之術輔尊靈王會朝諸侯而周室愈微諸侯愈叛楚懷王降祭祀事鬼神欲以獲福助卻秦師而兵挫地削身辱國危秦始皇初并天下甘心於神仙之道遣徐福韓終之屬多齋童男童女入海求神采藥因逃不還天下怨恨漢興新垣平齊人少翁公孫卿樂大等皆以仙人黃冶祭祠事鬼使物入海求神采藥貴幸賞賜累千金大尤尊盛至妻公主爵位重衆震動海內元鼎元封之際燕

齊之間方士瞋目扼腕言有神仙祭祀致福之術者以萬數其後平等皆以術窮詐得誅夷伏享至初元中有天淵玉女鉅鹿神人轅陽侯師張宗之姦紛紛復起夫周秦之末三五之隆已嘗專意散財厚爵祿竦精神舉天下以求之矣曠日經年靡有毫釐之驗足以揆今經曰享多儀儀不及物惟曰不享論語說曰子不語怪神惟陛下距絕此類毋令姦人有以窺朝者上善其言

哀帝建平元年博徵方術士 按漢書哀帝本紀不載 按郊祀志哀帝卽位寢疾博徵方術士京師諸縣皆有侍祠使者盡復前世所常興諸神祠官凡七百餘所一歲三萬七千祠云

新莽始建國二年興神仙事以方士蘇樂爲黃門郎 按漢書王莽傳不載 按郊祀志王莽篡位

二年興神仙事曰方士蘇樂言起八風臺於宮中臺成萬金作樂其上順風作液湯又種五梁禾於殿中各順色置其方面先鬻鶴髓毒冒犀玉二十餘物漬種計粟斛成一金言此黃帝穀仙之術也以樂爲黃門郎令主之莽遂寔鬼神淫祀至其末年自天地大宗以下至諸小鬼神凡千七百所用三牲鳥獸三千餘種後不能備乃以雞鶩鵠犬當麋鹿數下詔自以當仙

按莽篡位改元始建國

明帝永平八年楚王英奉繅紃贖愆詔以英學黃老令還贖 按後漢書明帝本紀不載 按楚王英傳英少時好游俠交通賓客晚節更喜黃老學爲浮屠齋戒祭祀永平八年詔令天下死罪皆入繅贖英遣郎中令奉黃繅白紃三十匹詣國相曰托在蕃輔過惡累積歡喜大恩奉送繅帛以贖愆罪國相以聞詔報曰楚王誦黃老之微言尙浮屠之仁祠潔齋三月與神爲誓何嫌何疑當有悔吝其還贖以助伊蒲塞桑門之盛饌因以班示諸國中傳英後遂大交通方士作金龜玉鶴刻文字以爲符瑞十三年男子燕廣告英與漁陽王平顏忠等造作圖書有逆謀事下案驗有司奏英招聚姦猾造作圖讖擅相官秩置諸侯王公將軍二千石大逆不道請誅之帝以親親不忍乃廢英徙丹陽涇縣

桓帝延熹八年遣中常侍左悺管霸祠老子 按後漢書桓帝本紀延熹八年春正月遣中常侍左悺之若縣祠老子十一月使中常侍管霸之若縣祠老子

延熹九年秋七月庚午祠黃老於濯龍宮 按後漢書桓帝本紀云云 按祭祀志九年親祠老子於濯龍文屬爲壇飾淳金鉞器設華蓋之坐用郊天樂也 按襄楷傳九年楷上書曰臣聞宮中立

黃老浮屠之祠此道清虛貴尙無爲好生惡殺省慾去奢今陛下嗜慾不去殺罰過理旣乖其道豈獲其祚哉或言老子入夷狄爲浮屠浮屠不三宿桑下不欲久生恩愛精之至也天神遺以好女浮屠曰此但革囊盛血遂不盼之其守一如此乃能成道今陛下淫女豔婦極天下之麗甘肥飲美殫天下之味奈何欲如黃老乎書上卽召詣尙書問狀尙書請下司隸正楷罪法收送洛陽獄帝不誅猶司寇論刑 按西域傳桓帝好神數祀浮屠老子百姓稍有奉者後遂轉盛

梁

武帝 年爲王侯朝臣解釋老子 按梁書武帝本紀帝洞達儒元雖萬機多務猶卷不輟手燃燭側光常至戊夜嘗作老子講疏王侯朝臣奉表質疑高祖皆爲解釋

普通 年詔庾承先學通黃老勒州縣時加敦遣 按梁書武帝本紀不載 按庾詵傳普通中詔曰潁川庾承先學通黃老該涉釋教並不競不營安茲枯槁可以鎮躁敦俗承先可中書侍郎勒州縣時加敦遣庶能屈志方冀鹽梅

元帝承聖三年述老子於龍光殿 按梁書元帝本紀承聖三年九月辛卯帝於龍光殿述老子義